



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

### 33. Kalenderwoche – ab 16. August 2009

## Dor Ball is rund

Dor Ball rollt widdor. Un dor Rubl ooch. Also, was heeßd „dor Rubl“? Das sachd mor ja bloß so. Nee, es is dor Euro dähr rolln dud. Daderbei missn die, die die Euros ins Schdadion rolln, fiehr jeden Euro hard arbeitn. De Fußballfenns sinn ja seldn so reische Benkor mid Bonifigadsjohnen odor so was. Nee, Fußballfenns sinn meisdens ganz normale Arbeitnehmor. Mansche sinn ooch Arbeitsuchor. Un die drachn dann ihre Schdidze in de Schdadions.

Jedes Wochenende kennnd isch mir in dähn Arsch beißn, dass isch nisch Fußballor gewordn bin. Ooch wenn die bloß off dor Resährvebank rumgoggn odor vorledzd sinn – midm Schnubbn villeischd! – dann krischn die drozdähm ihr Schrohd. Rollende Euros!

Un wenn sich die Glubs geschneidisch de Schbielor vorhögorn – dann dud dor Euro nisch bloß rolln, da dud dähr schbruhdeln!

Nee, isch hädde bessor Fussballor wern solln. Renn konnde isch eischendlich immor ganz guhd, mid de Fieße war isch ooch ganz geschiggd... so am Ball... Wobei, ob ischs dann werglich in de Bundesliescha geschaffd ham däde? Womeeschlich wär isch irschendwo in dor finfdn Liescha hänggebliehm? Naja, die Gefahr beschdehd immor. Un wahrscheinlich is die Gefahr fiehr een deudschn Fußballor, dassor irschendwo undn hängbleim dud, so groß wie niemals vorhähr!

Dass mor Schbord zur gesundheitlischn Volgserdischdichung bedreim dud, wie das dor alde Vador Jahn gedachd had, das is ja schon lange wurschdebiebe. Soll doch das eischne Volg off dor Dribiehne saufn un gröln, wenn da undn e baar Migrandn rumrenn, die midm Ball rumalborn, dann reischd das aus. Dor Rubl muss rolln! Na, is doch so. Wos jedzde widdor losgegang is in dor

Bundesliescha... okeh, es soll in mansche Mannschafdn noch welsche gähm, die in Deudschland geborn sinn. Zum Beischbiel von eingewandorde Boln odor Simbabwesahnor odor wie die heeßn... jednfalls, een Fußballor in dor Bundesliescha, dähr Eldorn hamm dud, die hier in Deudschland geborn wordn sinn, findsde kaum noch. Die ganzn Osis, die nach dor Wende dähn Bundeslieschafußball bereischord hamm, die sinn ja middlorweile fasd alle in Rende!

Nur noch Fremdlinge! Naja, un das is villeischd so, weil de deudschn Fußballor sisich nisch durchsbeißen kenn bis in de Bundesliescha. Un villeischd wäre mir das ooch bassierd, wenn isch Fußballor gewordn sein däde. Villeischd dud uns Deudsche irschendwie dor ledzde Wille fähln – dor absoluhde Ährgeiz! Mir wissn ehm, dass mor nodfalls mid Harzviere ibor de Rundn komm dud. Du mussd nisch ums Vorreggn dähn Gäschnor in Grund un Bodn rammln. Mir sinn villeischd mähr so zu Freindschafdsschiele geeischned? Wo mor sisich een Wimbl iborreischn dud vorhähr – un hinnerhähr e gemeinsames Bierschn in frehlichor Runde...- so missde fiehr uns Deudsche dor Fußball sein. Wo mor nisch unbedingt gewinn muss. Ja, fiehr dähn hardn Iborlähbenskambf sinn mir Deudsche villeischd zu sähr vorwehnd. Wie im Fußball also ooch in dor Wirdschafd!?

**Eduard Sachsenmeyer**